

PRAEFATIO EDITORIS.

Anni elapsi sunt fere tres, ex quo me partim meorum ratio studiorum, partim amicorum consilia impulerunt ad commentationem de metris Pindari conscribendam et edendam. Qua in re occupatus quum animo reputarem, quantos post Heynii sive recensionem sive recognitionem Pindaricae lectionis fontes aperuisset Godofredi Hermanni ingeniosa solertia, et quam dissimilia germanae divinorum carminum formae, qualem ex iis, quae de numeris poetae inveneram, licebat augurari, divulgata adhuc exempla essent: coepi de nova editione cogitare ita quidem adornanda, ut textum ex codicibus potissimum manuscriptis correctum in sua metra restituerem, ac, quae mea opera essent novata, tum commentationibus aliquot ad metricam praesertim rem pertinentibus, tum criticis animadversionibus vindicare a doctorum reprehensione, neque adderem praeterea quidquam. Sed redemptore librario rogante, ut interpretationem Latinam et Graeca Scholia mea manu emendata, deinde commentarios perpetuos, quibus Pindari carminibus, qua passim indigent, affunderetur lux, subiicere ne dedigneret; quum nefas ducerem, meam obstinationem, sive laboris impatientiam dixeris, honestissimi viri consiliis et bonarum litterarum incremento obesse, huic quoque negotio, quamvis fastidii pleno, malui me accingere, quam omittere quidquam, quod huic operi posset esse ornamento aut studiosis utilitati.